

ÅRSMELDING FOR 2015

Verksemda

Sund vatn og avlaup AS sitt vedtektsfesta føremål er: kjøp, utbygging, drift og vedlikehald av vass- og avlaupsanlegg i Sund kommune, og andre oppgåver knytte til det. Selskapet vart skipa 12.11.1998. Frå 01.01.2000 overtok selskapet ansvaret for drift og utbygging av offentlege vass- og avlaupsanlegg i kommunen. Frå 01.01.2002 overtok selskapet ansvaret for tømning av private slamavskiljarar. Selskapet har ikkje forskings- eller utviklingsprosjekt.

Personal- og organisasjonsforhold

Selskapet har pr. 31.12.2015 ni tilsette, to kvinner og sju menn: dagleg leiar, kontorleder, 1½ stilling knytt til byggjeleing og 5½ stilling knytt til drift.

Sidan arbeidsoppgåvene kan utførast av begge kjønn, er det ynskjeleg at også kvinner søker ledige stillingar.

Styret har fem medlemmer, to kvinner og tre menn.

Arbeidsmiljø

Arbeidsmiljøet er godt. Det er ikkje registrert ulykker med personskade. Sjukefråværet i 2015 var 4,8 %. Korttidsfråværet var 1,3 %.

Ytre miljø

Selskapet vidarefører utslepp av avlaupsvatn frå offentlege anlegg til sjø. Utover utslepp av avlaupsvatn har verksemda i 2015 ikkje hatt spesiell påverknad på det ytre miljøet.

Vidare drift

Rekneskapen er gjord opp under føresetnad av vidare drift av selskapet.

Resultat

Selskapet hadde ei driftsinntekt i 2015 på kr 27 995 204,- i form av vassgebyr, avlaupsgebyr, gebyr for slamtømning og andre driftsinntekter. Resultatet av finanspostar, kr -2 009 053,-, er i hovudsak renteinntekt på bankinnskot og rentekostnad på lån.

Året er gjort opp med eit overskot på kr 1 792 586,-.

Drift

Vaktordning og driftsovervaking

Selskapet har ei vaktordning som handterer alarmtelefonar og andre meldingar om driftsproblem. Vassverka, høgdebassenga og dei fleste pumpestasjonar for avlaup er knytte til eit anlegg for driftsovervaking. Tidleg varsling av feil og tilgang til informasjon om drifta gjer at ein stort sett kan hindra ulemper for abonnentane.

Drift av avlaupsanlegga

Drifta ved avlaupsanlegga er i hovudsak stabil og god. Det vil framleis vera behov for å vidareføra tiltak for å utbetra eldre leidningar.

Drift av vassverka

Tiltak for å sikra stabil og sikker levering av vatn i ulike driftssituasjonar har også i 2015 hatt høg prioritet gjennom drifta av vassverka. I 2015 er mellom anna råvassledninga til Stranda/Glesnes vassverket bytta ut, dette gjer langt høgare driftsikkerhet.

Utbygging

Planar og gjennomføring

Vass- og avlaupsanlegga i Sund vert bygde ut etter prioriteringa i hovudplanane for vatn og avlaup. Hovudplanane for perioden 2015–2025 er utarbeidde av Sund kommune og vart vedtekne av kommunestyret 16.06.2015. Framdrifta for utbygginga vert tilpassa tilgjengeleg kapital i form av vass- og avlaupsgebyr, og tilpassa framdrifta for veganlegg som inngår i samordna utbygging. Det er eit overordna mål at ein med utbygging av vass- og avlaupsanlegg skal leggja til rette for bustadbygging i alle bygdene i Sund, og sikra god vassforsyning til industrien.

Ein har lykkast godt i å kombinera utbygging av VA-anlegg med andre tiltak, som vegutbetring, gang- og sykkelveg og veglys. Sund VA har teke kostnaden med VA-anlegga, medan Sund kommune og Statens vegvesen har finansiert andre tiltak. Utbygginga av VA-anlegga har dei siste åra ført til omfattande opprusting av vegnettet i kommunen, fordi ein ved å leggja til rette for samordna utbygging oppnår god økonomi for alle partar. Sund VA har forskotert prosjekteringskostnadene gjennom planfasen, og elles teke på seg dei oppgåvene som har vore naudsynte for å kunna planleggja og gjennomføra prosjekta.

Den utbygginga som er gjennomført, hadde ikkje vore mogleg utan den store velviljen som prosjekta har møtt hos Statens vegvesen, Hordaland fylkeskommune og andre styresmakter, grunneigarane og andre samarbeidspartnarar.

Kørelen vassverk

Prosessen kring klausulering av vasskjelda og tilsigsområda i både Fjell kommune og Sund kommune skal halda fram også i 2016. Fjell kommune vedtok i 2011 ein revidert hovudplan for vassforsyning der Kørelen inngår som framtidig vasskjelde. Det vert lagt opp til å innarbeida regelverk for å sikra nedbørfelt og vasskjelde i kommuneplan og/eller kommunedelplan, samordna mellom kommunane Fjell og Sund.

Søknad om konsesjon for framtidig vassuttak for Fjell og Sund kommunar er sendt NVE som står for den vidare høyringsprosess og sakshandsaming etter vassressurslova. Søknaden vart lagt ut til høyring 2015, og prosessen er ikkje avslutta i 2015. Rett til dagens uttak av drikkevatt for Sund kommune, ut frå vassressurslova, er avklara gjennom at NVE har gjeve konsesjonsfritak. Vassuttak i høve til grunneigarrettar skal avklarast i samband med klausuleringa.

Planarbeid Eide – Spildepollen

I samarbeid med Statens vegvesen og Sund kommune vert det i 2016 igangsett utbygging av fortau/gang- og sykkelveg, opprusting av veg, trafikksikring og nye VA-leidningar. Det er gjennomført grunnverv og anbodskonkurranse på strekninga. Utbygginga vil binda saman Kørelen vassverk med Glesnes og Telavåg. Finansieringa av vegbygginga er avklara, det vil verte ei deling mellom Hordaland Fylkeskommune, Sund kommune og Sund VA. Oppstart av prosjektet skal endeleg godkjennast av Sund kommunestyre våren 2016.

Planarbeid Vorland – Forland

I samarbeid med Statens vegvesen og Sund kommune er det utarbeidd planar for utbygging av gang- og sykkelveg, opprusting av veg, trafikksikring og nye VA-leidningar. Det har vore arbeid parallelt med reguleringsplan, detaljplan og gjennomføring av grunnverv. Reguleringsplan er godkjend. Finansieringa av vegbygginga er ikkje avklara.

Utbygging Trellevik – Viksøyvågen

Ny vassleidning frå Trellevik, i sjø fram til Viksøy nord og vidare langs veg til Viksavågen. Leidningen sikrar forsyninga i området og gjev ny offentleg vassforsyning til Viksøy sør. Arbeidet er fullført i 2015.

Utbygging Midtstegen – Skaganeset

Ny vassleidning frå høgdebasseng i Midtstegen, i terreng til Ådnavika og vidare i sjø til Skaganeset. Leidningen sikrar forsyninga til industriområdet, og vidare til kommunen elles. Arbeidet er ferdigstilt i 2015, og ledningen tatt i bruk.

Kapasitesauke Kørelen Vassverk.

Tilbygg og ein 4. produksjonsline ved vassverket vart ferdigstilt i 2015. Kapasiteten vert auka med omlag 30 % for å styrke leveringsikkerheten til kommunens innbyggere og industri. Som følge av kapasitesauken, har Kørelen vassverk i periodar forsynt heile kommune med vatn.


VA-gebyr

Gebyra for 2016 vart auka med 2,7 %. Hovudplanane for vatn og avlaup, og langtidsbudsjettet for selskapet, legg opp til at gebyra skal regulerast med den årlege generelle pris- og kostnadsveksten. Det er kommunestyret som fastset gebyra.

Midtstegen, 28.04.2016

Sund vatn og avlaup AS

Styret



Bjørn Ove Børnes



Wenche Hamre Kauffmann



Geir-Elling Nygård



Turid Rabben



Jan Rune Skoge



Michal Forland
dagleg leiar